



19. august 2022

UKA 2022/87

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Takornariaqarneq aallaavigalugu ilinniarfiusinnaasumik Ilulissani ilinniartoqarfimmik pilersitsinissamut aalajangiisoqarsinnaanissaanut tunngavissanik Naalakkersuisut misissuinissaat pillugu Inatsisartut aalajangiiffigisassaattut siunnersuut. Ilinniartoqarfik minnerpaamik serviceøkonom, Arktisk Turistguide aamma Adventure Guide ilinniakkatut pigissavai. Misissuineq kingusinnerpaamik UKA 2023-mi Inatsisartunut tunniunneqassaaq.

(Inatsisartunut Ilaasortaq Nivi Olsen, Demokraatit)

Tunngavilersuut

Ukiut ikkittut qaangiuppata atlantiku qulaallugu mittarfik Ilulissani ammassaaq. Demokraatit ukiorpassuarni mitarfittaartoqarnissaa sorsuutiguarfikuuuaa, nuannaarutigarpullu maanna ammartussanngormat.

Mittarfik ammariapat Ilulissani takornarissat amerleriarnissaat naatsorsuutigineqassaaq. Ullumikkut Ilulissani eqqaanilu takornarissat ima amerlareertigaat aasat tamaasa nunatta avataniit sulisussanik annertuumik pisariaartitsisoqartarluni. Demokraatiniit pingaartipparput takornarialerisussani nunatsinneersut atorneqarnissaat qulakkiissallutigu.

Ullumikkut imaappoq takornariaqarneq aallaavigalugu ilinniagaqarniaraanni kisimi Nuummi aamma Qaqortumi kisimi ingerlanneqarsinnaalluni. Kisiannili uggornartorujussuuvoq Kalaallit Nunaanni takornariaqarnikkut illoqarfik nuannarineqarnerpaaq annerpaarlu takornariaqarnermut tunngasunik ilinniarfigineqarsinnaanngitsoq, tassa Ilulissat. Tamanna sukkanrepaamik allanngorttariaqarrput.

Ilulissani takornariaqarneq aallaavigalugu ilinniartoqarfimmik pilersitsineq, illoqarfimmi takornarialerinikkut sulisussanik pisariaqartitsinerpaasartumi inissisimassaaq. Tamanna pitsaasunik malitseqassaaq.

Misissuinissamik siunnersuutigineqartoq, ilinniartoqarfimmi minnerpaamik ukuningga neqerooruteqartarnissaa immikkut isiginiarneqassaaq:

- Serviceøkonom, takornarialerineramik sullissinermillu suliffeqarfinnik ineriartortitsineq ingerlatsinerlu immikkut sammisatut
- Arktisk Turistguide, illoqarfinni nunaqarfinnilu guide-iunissaq immikkut sammisatut
- Arktisk Guide, qaqqani guide-rineq isumannaallisaanerlu immikkut sammisatut

Taamatut oqaaseqarlunga Naalakkersuisut akissutissaat partiillu sinnerisa oqaaseqaatissaat qilanaaraakka.

Pisortanut aningaasatigut allaffissornikkullu kingunissai

Misissuinissaq siunnersuutigineqartumut aningaasartuutissat million affai qaangernissaat naatsorsuutigineqanngilaq



Namminersorlutik inuussutissarsiuteqartunut aningaasatigut allaffissornikkullu kingunissai
Soqanngilaq

Innuttaasunut aningaasatigut allaffissornikkullu kingunissai
Soqanngilaq